



Skina di Ruthy

Inspirando un Crenchi cu Carnaval

Skirbi pa Ruthy "Lady Ruth" Vrieswijk-Bergen

Ta te ki dia den e luna aki di Januari, e prome luna di anja 2014 nos ta desea otro un Bon Anja? Un pregunta cu mi a lesa riba facebook algun dia pasa. Mi contesta: "Segun bo mesun curazon", segun bo ta topa cu famia y amigonan cu bo no a wak ainda e anja aki. Si, hasta den e siguiente luna cu ta februari of maart etc., pakico no? No tin ningun ley cu ta prohibibo di hasi esaki, toch?

Bo no hoef di duna cuenta na ningun hende cu bo ta hasi esaki, toch? Bo no mester di ningun aprobacion, den sigui bo mesun curazon cu bo bon deseonan pa un otro, mas bo desea otro cos bon, mas bon ta bini pa bo, un ta sina? Un otro topico cu nos a combersa di dje, con antes e brassbandnan tawata causa asina hopi furor cu nan tocamento, hasta e nomber Hells Angels a wordo menciona, como un di esnan mas respeta anjanan pasa. Carnaval cu a caba di hasi su entrada oficial cu e fakkel optocht, den su 60 anjanan di existencia.

Mi no a nace ainda e anja cu Carnaval a cuminsa, pero a yega di participa como un mucha hoben di 14 anja, despues cu mi 15 y 16 anja, y despues anjanan despues hunto cu mi casa. Den un di mi bukinan cu mi a skirbi, mi a comparti cu mi lo partipa un biaha den e eleccion di Mrs. Carnaval dia mi a cumpli 50 anja di edad, pero no por a concretiza e deseo ey y awor menos. Cu Carnaval ta costa hopi placa tur hende por wak. Naaaaaaah, mi no ta bai competi cu Juby Naar tocante Carnaval. E cu su pipo popo ta informa ta informa lectornan bastante caba di e tema aki. Pero, como ex-lider scout y mayor cu a yuda forma muchanan den scouting, toch un crenchi preocupa pa tur e tentacionnan eifonan den cualkier eleccion, den cualkier parada of na banda.

Nos isla cu a crese den e cantidad di habitantenan, no por tin polis na boshi tur caminda tur ora y ni maske nos tin un helicopter cu ta yuda, hopi cos stranjo por pasa cu of sin demasiado alcohol den curpa. Inocentenan cu por encontra cu un of otro appel putri den nan grupo cu ta danja e asunto pa tur cu un of otro mal comportacion of mal comprendemento.



A tende comentarionan cu e gruponan ta demasiado grandi pa un banda musical so. Just parti e grupo den grupitonan y laga nan jump beurt pa beurt tras di e banda musical, mientras e otro nan ta descansa, cana, disfruta di nan coi bebe, toch? Sistema di rotation.

Ach, e Oma Lulu den mi cu ta wak cosnan na maneranan mas trankil. No tin pura y no ta ansha pa nada. Ban pusta otro anja sac ta bin cu Mrs. Grandma election, hahahaha! Cu reglamento pa ta wela legitimo sin tinja cabe, hahahaha. Y sin cambionan artificial, solamente djente falso mag....ooooops!!!

Si, pasobra Mrs. Carnaval ta pa esnan cu no ta mama of wela di edad un crenchi halto cu no ta asina hoben mas. Wel, bin anto cu eleccion di Mrs. Grandma....y corda bin apoya Lady Ruth e ora, okay? Laga tur e welanan

participante sinta conta un storia na un grupo di mucha riba stage y canta cu nan, toch?

Si, live, nada falso, nada graba di antemano, a la naturale. Anto....e candidatanan wela tur cu rollers den cabe, manera Tica basha abao, lol....hahah Enfin.....ban poco poco riba caminda shonnan, no exagera den bebemento di alcohol durante henter e temporada laaaaaaargo aki di Carnaval cu tin hopi hende fada caba cu musica duro cu no ta laga nan drumi anochi. Ah., mi a lubida di bisa, cu e hurado pa eligi e Mrs. Grandma, mester consisti di muchanan entre 7 y 10 anja di edad....lo ta algo unico di berdad! Papiando di muchanan, mira mi dos nietonan ta practicando caba cu tocamento di piano, ja caba nan ta train nan dushi calypsonan y roadmarch, pasobra ta Edward y William lo bay cu e titulo maximo e anja aki, no tin awa pa laba. Danki pa lesa mi relatonan, y esun di awe cu un toke humoristico sigur cu a pone un sonrisa grandi riba bo cara. Pasa un dushi dia yen di alegria cu un curason yen di bendicion na gradicimento pa e regalo "BIDA" cu nos salud tur dia!